

मनीष श्रीवास्तव



कुलसचिव (कार्यवाहक)
गुरु घासीदास विश्वविद्यालय
बिलासपुर, छत्तीसगढ़

फेर उही....

फेर उही 18 जून ।
न चैन न शुकुन ।
फेर उही घण्टी ।
बबली अऊ बण्टी ।
लईका मन के रांव रांवकांव कांव ।
पहिली ले पांचवी, कोन कक्षा जांव ।
फेर समन्वयक के अवई जवई ।
नानम् परकार के पत्रक भरवई ।
उही मूत्रालय, उही शौचालय पयखाना ।
फोटो खींच खींच के साहेब मन ल बताना ॥
मनटोरा भउजी चाऊर ल देवत हे फुन ।
न चैन न शुकुन ।
फेर उही 18 जून ॥
फेर रेडियो, टी बी के लफड़ा ।
उही थारी, टिमटिमी अऊ दफड़ा ।
फेर उही परशिक्षन ।
साहेब मन के निरीक्षण ॥
फेर कुरता पैठ के छटई ।

नम्बर हिसाब से बंटई ॥
फेर अब पनही आही काहत हे ।
भगवान जाने सरकार, काय चाहत हे ॥
तहुँ मोरे कस गुन ।
न चैन न शुकुन ।
फेर उही 18 जून ॥
फेर दरुहा ह स्कुल म लऊ ठी पटकही ।
देखबे, ओकर बोटरी आंखी भारी छटकही ॥
चिपरा सारे धोवाय नई राहय ।
गऊकिन, गुरु जी कतेक ल साहय ॥
फेर उही मध्यान्ह भोजन ।
लईका मन ल कहां कहां खोजना ॥
मध्यान्ह भोजन म कीरा कहूँ परगे ।
गऊकिन ददा, परधान पाठक मरगे ॥
कतेक काहय, कतेक लिखय, अभी अतके ल सुन ।
न चैन न शुकुन ।
फेर उही 18 जून ॥
जय जोहार संगवारी हो...।

